

四庫全書

子部

欽定四庫全書

太平御覽卷

百六十

宋 李昉等 撰

州郡部六

河南道下

滑州

濮州

濟州

鄆州

青州

齊州

淄州

萊州

登州

密州

徐州

泗州

兗州

海州

沂州

滑州

十道志曰滑州靈昌郡置在白馬禹貢兗州之域春秋

時衛地戰國時屬魏秦為東郡地

左傳曰狄滅衛衛立戴公以廬于曹

今白馬地
即曹邑也

衛文公

自曹邑遷于楚

今衛南
地也

衛成公又遷于帝

今濮陽
縣也

史記曰秦始皇五年拔魏十五城始置東郡

後漢書曰樊條封燕侯即東郡也

濮州

十道志曰濮州濮陽郡置在鄆城縣禹貢兗州之域春秋時衛地戰國時屬齊秦併天下即東郡地在漢爲濟陰郡之鄆城縣

左傳曰齊桓公會諸侯于鄆

杜注曰衛邑今東郡鄆城是也

史記曰齊威王九年趙伐我取鄆

左傳曰衛侯夢於北宮見人登昆吾之墟

注云衛有觀在昆吾之墟

今濮陽城是

史記曰舜耕于厯山耕者讓畔

應劭曰厯山即雷澤中山也

水經曰昔師延爲紂作靡靡之樂武王伐紂延東走自

投濮而死衛靈公將之晉舍於濮水之上夜聞歌聲召

師涓受之

濟州

十道志曰濟州濟陰郡置在盧縣禹貢兗州之域春秋
時其地屬齊秦兼天下爲東郡在平地

在音仕
淄反

左傳曰齊鄭盟于石門尋盧之盟杜注曰今盧縣故城
是

史記曰扁鵲生盧故曰盧醫

鄆道元注水經曰碣磔城西即故在平縣城碣磔即今州
是也沈約宋書作敲斃字

宋書曰元嘉七年到彥之北征拔碣磝後失之至二十七年以王玄謨爲寧朔將軍先鋒入河平之於此固守因置碣磝城

郡國志曰後魏置濟州於單父城中昔石勒於耕處聞鼓角之聲即此

圖經曰東阿春秋時齊地也

郡國志曰其地出繒縑故秦王服阿縞

十道志曰石窰在長清縣

左氏傳曰齊晉戰于鞍齊師敗績齊侯自徐闢入辟女
子曰君免乎曰免銳司徒免乎曰免既而問之辟司徒
之妻也與之石窀

鄆州

十道志曰鄆州東平郡置在須昌縣

元和郡國志曰禹貢兗州之域春秋時屬宋即魯附庸
須句國

句音
加

戰國時其地屬魏秦爲薛郡地漢爲東平

國

左傳曰晉人執季文子於莒丘公還待於鄆杜注曰鄆

魯西邑

又僖二十二年伐邾須句

僖公將也

又哀公十四年西狩于大野叔孫氏之車子鉏商獲麟

賜虞人

大野即鉅野縣

青州

十道志曰青州北海郡置在益都縣

元和郡國志曰少昊之墟古青州之地舜時以青州越

海遼遠分爲營州武王克商封師尚父於齊營丘周成
王少時命太公東至于海西至于河南至於穆陵北至於
無棣五侯九伯實得征之後子孫爲秦所滅分齊地置
齊瑯琊二郡漢爲臨淄郡

圖經曰少昊之代夾鳩氏虞夏則有季荊

仕則反

湯公逢

公伯陵

逢音蒲江反

殷未有蒲姑皆爲諸侯國於此地周成

王時蒲姑與四國作亂成王滅之以封太公

史記曰齊有清河濁河可以爲固長城鉅防足以爲塞

又曰蘇秦東說齊宣王曰齊南有泰山東有瑯琊西有
清河北有渤海此所謂四塞之國也齊地方二千餘里
齊軍之良進如鋒矢戰如雷霆解如風雨即有軍役未
嘗倍泰山絕清河涉渤海也臨淄甚富其民無不吹竽
鼓瑟彈琴擊筑鬪雞走狗臨淄之塗車轂相擊人肩相
摩連社成帷舉袂成幕揮汗成雨家給人足志氣高揚
又曰齊所以名齊者有天齊祠也

又封禪書曰始皇遊海上祠名山大川及八神求羨門

之屬八神一曰天主祠天齊天齊淵水居臨淄南郊山下

漢書曰夫齊東有瑯琊即墨之饒南有泰山之固西有濁河之限北有北海之利地方二千里持戟百萬懸隔千里齊得十二焉

又曰齊有三服之官綺爲首服紈素爲冬服輕綃爲夏服

韓詩外傳曰齊景公遊於牛山之上北望齊國曰美哉

國乎鬱葱使古而無死則寡人將去此何之矣俯而泣下涕
沾襟國子高子曰然臣賴君之賜疏食惡衣可得而食也
駕馬柴車可得而乘也且猶不欲死而况君乎又俯首
而泣晏子笑曰樂哉今日之遊宴也見怯君一諛臣二
使古而無死則太公丁公至今猶存吾君方將被菴笠
而立畎畝惟農事之恤何暇念死乎公慙乃引觴

韓子曰景公與晏子遊于少海登栢寢之臺而望其國
曰美哉堂堂乎後代孰有此晏子曰其田氏乎公曰寡

人有國而田氏有之奈何對曰君欲奪之則近賢遠不肖振窮恤孤雖十田氏其如君何

齊記曰晉永嘉五年東萊年平曹嶷爲刺史所築城有大澗甚廣因之爲固謂之廣固城則有五龍口

崔鴻十六國春秋南燕錄曰慕容德初議所都尚書潘聽曰青齊沃壤號曰東秦土方二千里四塞之固負海之饒可謂用武之國廣固者曹嶷之所營山川險峻足爲王者之都從之

齊州

十道志曰齊州齊南郡置在厯城縣古兗州之域

周禮曰玄枵齊之分野

左傳曰晉平公伐齊戰于厯下

史記曰舜耕于厯下

竹書穆天子傳曰天子自五鹿東征釣於漯水以祭淑

人已己天子東征飲于漯水之上

漯水在紀阿
即今禹城縣

郡國縣道記曰章丘古高唐縣也春秋時齊邑

史記曰齊威王使盼子守高唐趙人不敢東漁于河

淄州

十道志曰淄州淄川郡置在淄川縣禹貢青州之域周之九州爲幽州之境春秋及戰國時屬齊秦爲齊郡漢爲濟南郡之般陽縣

漢志曰般陽屬濟南郡應劭曰在般水之陽王莽曰濟南亭

圖經曰長山縣本漢於陵縣也隋改焉以界內長白山

爲名

漢志曰於陵屬濟南郡王莽曰於陸

郡國志曰長山於陵城散宜生得瑞獸之地

萊州

十道志曰萊州東萊郡置在掖縣禹貢青州之域周之九州爲幽州之境秦置三十六郡屬齊郡漢志高祖置東萊

尚書禹貢曰萊夷作牧

左傳曰齊侯伐萊萊人使正與子賂風沙衛以索牛羊
皆百足齊師乃還後齊人復入萊萊恭公淳柔犇堂晏
弱圍堂滅之遷萊子於郕

郡國志曰東萊以其在齊國之東故云東萊

史記曰周武王封太公於營丘萊侯聞之遂與太公爭
營丘

左傳曰聊攝以東姑尤以西其爲人也多矣

聊攝齊西
界姑尤齊

東界謂聊城攝城姑
尤水在即墨縣

漢書郊祀志曰武帝元封元年大旱禱萬里沙孟康云

沙長三百里

沙在萊州界

地理志曰長廣縣有獫狁澤

周禮職方氏曰幽州之藪曰獫狁

長廣今昌陽縣

登州

十道志曰登州文登郡漢牟平縣屬東萊郡文帝封齊惠王子將闔為牟平侯將闔邑也

圖經曰古萊子國戰國及秦屬齊郡漢已下屬東萊郡

又曰文登漢腫縣有梁山

漢書曰腫有梁山丹水所出

師古曰腫直類切

史記曰始皇二十八年行郡縣上太山過黃腫經成山其後二十九年又東遊登成山升之采勒石紀功

密州

十道志曰密州高密郡置在諸城縣禹貢青州之域兼得徐州之地秦爲瑯琊郡漢屬齊文帝分齊立膠西國封齊悼惠王子卬爲膠西王都高密

齊記曰密州本東武縣樂府東武郡吟是

秦本紀曰始皇二十八年南登琅邪大樂之留三月乃徙黔首三萬戶琅邪臺下

吳越春秋曰越王勾踐二十五年徙都瑯琊立觀臺周旋七里以望東海

史記曰齊湣王爲燕師所敗唯莒與即墨二城不下立湣王之子法章於莒是爲襄王

徐州

十道志曰徐州彭城郡置在彭城縣

元和郡國志曰禹貢徐州之域春秋時宋滕薛小邾偃陽之地六國時屬楚秦併天下爲泗水郡楚漢之際楚懷王自盱眙徙都之後項羽徙懷王於柳自立爲西楚霸王又都於此漢爲泗水郡後爲彭城郡

漢書曰高祖過沛留置酒沛宮悉召故人父老子弟佐酒發沛中兒得百二十人教之歌酒酣上擊筑自歌大風之歌令兒皆習和之上乃起舞忼慨泣下謂沛父老

曰遊子悲故鄉吾雖都關中萬歲之後吾冤冤猶思沛
宋書曰高祖經畧中原以彭城險要置府於此後王玄
謨上表曰彭城南屆大淮左右清汴城隍峻整襟衛周
又自淮以西襄陽以北經塗三千達于濟岱六州之民
三十萬戶實由此境

後魏書曰尉元上表曰彭城宋之要藩南師來侵莫不
因之以凌諸夏

泗州

元和郡國志曰泗州臨淮郡理淮縣禹貢徐州之域春秋屬魯又爲徐子之國後秦滅楚爲泗水郡漢分置臨淮郡

漢書地理志曰公猶屬臨淮郡王莽曰康人

公音仇即連水也

都城記曰周穆王末徐君偃好行仁義東夷歸之者四十餘國穆王西巡聞徐君威德日遠遣楚襲其不備大破之殺偃王其子遂北徙彭城百姓從者數萬都徐國今徐城是也

兗州

十道志曰兗州魯郡置在瑕丘縣

元和郡國志曰禹貢兗州之域春秋時爲魯國武王即位封周公於少昊之墟曲阜之地周公不就至于伯禽乃就封之後三十四君爲楚所滅楚以魯爲薛郡漢爲魯國魏太祖爲兗州牧焉

左傳曰季康子伐邾以邾子益來囚諸負瑕杜注云魯邑也有瑕丘城即今縣

家語曰夫子爲中都宰今有中都城在焉

漢書曰高祖畧地取湖陵方與地志屬山陽郡即今方
與縣也左傳隱公五年矢魚于棠即此地唐爲魚臺
縣

漢書曰吳楚七國反天子命周亞夫將三十六軍擊之
亞夫至淮陽問客鄧都尉策安出客曰莫若引兵東北
壁昌邑以梁委吳使輕兵絕淮泗口塞吳饗道使吳梁
相弊乃以全制其極破吳必矣亞夫從之乃破吳

今金鄉縣

有昌邑
故城

魏志曰太祖欲征陶謙時呂布在兗州荀彧說太祖曰
昔高祖居關中光武據河內皆深根固蒂於以制天下
進足以勝敵退足以自守故雖有困敗而終濟大業將
軍本以兗州首事平山東之難百姓無不歸心悅服且
濟河天下之要地是亦將軍之關中河內也不可先
定乃從之

海州

十道志曰海州東海郡置在朐山縣禹貢徐州之域春秋魯國之東境七國時屬楚秦爲薛郡地後分薛郡爲剡漢改剡爲東海郡

漢書曰朐屬東海郡秦始皇立石海上以爲東門闕又曰東海郡祝其羽山在南鯨所殛之地王莽曰猶亭左傳曰公會齊侯于夾谷即此

沂州

十道志曰沂州瑯琊郡置在臨沂縣禹貢徐州之域也

春秋時齊郡泰置瑯琊郡

論語夫子曰點爾何如曰暮春者春服既成冠者五六人童子六七八人浴乎沂風乎舞雩詠而歸夫子喟然嘆曰吾與點也

又曰子之武城聞絃歌之聲夫子莞爾而笑曰割雞焉用牛刀

又曰公山弗擾以費畔召子欲往子路不悅曰未之也
已何必公山氏之之也

漢地理志曰襄賁屬東海郡王莽曰章信後屬瑯琊郡

賁音肥

太平御覽卷一百六十

欽定四庫全書

太平御覽卷一百六十一

宋 李昉等 撰

州郡部七

河北道上

懷州

孟州

衛州

相州

洛州

邢州

冀州

趙州

鎮州

定州

瀛州

懷州

元和郡縣圖曰懷州河內郡禹貢冀州之域覃懷之地
周為畿內及衛邦雍三國春秋時屬晉七國時屬韓魏
二國秦兼天下滅衛為三川郡

後漢書曰光武既定河內於是拜寇恂為河內太守恂

移書屬縣講兵肄射伐湛園之竹以爲矢養馬收租以給軍

左傳曰周與鄭人蘇忿生之田州陘隤懷

地今河內縣

又曰襄王賜晉文公以陽樊溫原攢茅之田晉於是始

啓南陽

在晉山之南河之北故曰南陽

元和郡縣圖曰河內縣春秋野王邑也

左傳曰晉人執晏弱于野王

漢志曰武德縣屬河內始皇東巡自以武德定天下故

名之也

十道志曰修武本寧邑也

韓詩外傳曰武王伐紂勒兵於寧故改曰修武

韓非書曰秦昭王敗趙長平西伐修武

漢書曰漢武帝將幸緱氏至汲縣之新中鄉得南越相
呂嘉首因立爲獲嘉縣

孟州

圖經曰孟州河陽郡禹貢冀豫二州之境周武王伐紂

會孟津是也周爲畿內蘇忿生之邑後爲晉邑

左傳曰晉侯召王以諸侯見且使王狩仲尼曰以臣召君不可以訓故書曰天王狩于河陽

北齊書曰神武使潘樂鎮北城又使高永樂守南城以備西魏於東魏所築中渾城仍置河陽關故有河陽三城

冀州圖經曰河陽在河內郡南六十四里有宮有關晉書曰潘岳才名冠世爲衆所嫉出爲河陽令

左傳隱三年曰鄭祭足帥師取溫之麥秋又取成周之禾

又僖十年秋滅溫

今河內溫縣

溫子奔衛周襄王以地賜晉

文公

衛州

元和郡縣圖曰衛州汲郡禹貢冀州之域後爲殷都衛縣界朝歌是也戰國時屬魏秦屬河東郡漢爲汲縣地理志河內殷之舊都周既滅殷分其畿內爲三國詩

風邶鄘衛是也邶以封紂子武庚鄘管叔尹之衛蔡叔尹之以監殷人謂之三監

史記曰周公以成王命興師殺武庚祿父殺管叔放蔡叔以殷餘民封康叔爲衛君居河淇之間故商墟

漢志曰朝歌屬河內紂所都周武王弟康叔所封更名衛王莽曰雅歌

劉子曰邑號朝歌墨子迴車

續漢書曰虞詡爲朝歌令多盜連年不解親舊多勞帛

之曰得朝歌何衰也詡笑曰難者不避易者必從臣之節也詡謁河內太守馬稜稜曰君儒者乃在朝歌甚爲君憂之詡曰賊犬羊相聚以求飽暖耳去放倉不過百里不如取以爲根青冀州民不知掠以爲衆守其阨塞此謂斷天下之右臂也今則不然此謂大計之効也詡患平之

春秋後序曰太康五年吳寇始平余自江陵還襄陽解甲休兵乃申予舊意修成春秋釋例及經傳集解始訖

會汲郡汲縣有發其界內舊塚者得古書皆簡編科斗文字發塚者不以爲意往往散亂科斗書久廢推尋不能盡通始者藏在秘府余晚得見之

劉登之山川古今記曰黎陽國也詩曰黎侯寓于衛是也

相州

元和郡縣圖曰相州鄴郡禹貢冀州之域春秋時地屬晉戰國時屬魏魏文侯使西門豹守鄴是也秦併天下

爲邯鄲上黨二郡之地漢高祖分置魏郡治鄴尚書曰
河亶甲居相

後魏書曰道武幸鄴訪立州名尚書崔光對曰昔河亶
甲居相宜曰相州道武從之

漢志曰魏郡領鄴館陶斥丘等一十八縣

後魏書曰文帝太和十八年卜遷都經鄴登銅雀臺御
史崔光等曰鄴城平原千里漕運四通有西門吳起舊
迹可以饒富在德不在險請都之孝文曰君知其一未

知其二鄴城非長久之地石虎傾於前慕容滅於後國
富主奢暴成速敗且西有在入山東有列人縣北有栢
人城君子不飲盜水惡其名也遂止

魏志曰黃武二年以魏郡東部爲陽平郡西部爲廣平
郡廣平陽平魏平三郡爲三魏也

圖經曰安陽紂都也在淇洹二水之間本殷墟所謂北
冢是也

戰國策曰紂昔聚兵百萬左飲淇水使竭右飲洹水不

流

晉書載記曰石勒諸將佐議欲都鄴將攻三臺張賓進曰三臺險固攻之未可卒下於是進取襄國

漢志曰內黃屬魏郡春秋吳子晉侯會于黃池今黃澤在西陳留有外黃故加內云

洛州

十道志曰洛州廣平郡屬禹貢冀州之域春秋時爲赤狄之地後屬晉

左傳曰晉荀林父敗赤狄于曲梁是七國時屬趙秦併天下為邯鄲郡漢初置廣平國

禹貢曰覃懷底績至于衡漳

衡漳在肥鄉縣

左傳曰公會單頃公及諸侯同盟于雞澤杜注云雞澤在廣平曲梁縣

漢志曰廣平國領縣十六武帝征和二年改為平子國宣帝復故王莽曰富昌

十道志曰洛水縣本漢斥漳縣也

漢志曰以其國斥鹵故云斥漳

又曰曲周屬廣平國恭曰直周

圖經曰邯鄲單盡也邯山名謂邯山之盡所也

邢州

十道志曰邢州鉅鹿郡禹貢冀州之域秦併天下於此
置信都縣屬鉅鹿郡

左傳曰凡蔣邢茅周公之胤也

又成十五年楚大夫申公奔晉晉以爲邢大夫

東陽晉之山東

魏郡廣

平是

郡國志曰邢州尚書坊東平地周百餘步其所鳴響人馬行上轟轟有聲掘之即火出

十三州志曰鉅鹿唐虞時大麓之地尚書堯試舜百揆納于大麓麓則林之大者堯之禪舜欲使天下皆見之故合羣臣與百姓納之大麓之野然後授舜以明已禪也

張耳傳曰高祖徙平城還過趙趙王自上食禮甚卑高

祖箕踞趙相貫高等乃壁入栢人要之過宿心動問縣名爲何曰栢人上曰栢人者迫於人也不宿而去

栢人今堯

山縣

冀州

十道志曰冀州信都郡

元和郡縣圖曰春秋時屬晉七國時屬趙在秦屬鉅鹿郡

李公緒趙記曰趙孝成王造壇臺之宮爲趙都朝諸侯

故曰信都

史記曰秦時有客說張耳曰兩君羈旅難以獨立立趙後扶以義可就功乃求趙歇立爲趙王居信都

漢書曰項羽分趙立張耳爲長山王居信都改曰襄國晉書曰張賓說石勒曰襄國因山憑險實形勢之國可都之遂都於此

晉書曰初童謠曰古在左月在右讓去言或入口古在左月在右胡字也讓去言爲襄也或入口爲國也尋爲

石勒所都

後漢書曰王郎僭號河北悉應光武自冀薊南行至下
博惶惑不知所之有白衣父老在道傍指曰努力信都爲
長安守光武即馳赴信都太守任光開門出迎

魏志曰韓馥爲冀州牧公孫瓚欲襲之袁紹使高幹諷
馥令以冀州讓紹馥素懼因然其計馥長史耿武諫
曰冀州雖鄙帶甲百萬穀支十年袁紹孤客窮軍譬如
嬰兒在股掌之上絕其乳哺立可餓殺奈何以州與之

馥不從以州與紹

盧植冀州風土記曰冀州聖賢之衆數帝王之舊也

十三州志曰冀州之地古今京也人患剽悍故語曰仕宦不偶值冀部

後漢書曰王郎起光武自薊南馳及至南宮遇大風雨
光武引車入道傍空舍馮異抱薪鄧禹爇火光武對竈
燎衣異進麥飯兔肩

魏志曰太祖拔鄴領冀州牧或說太祖宜復古置九州

冀州所制者廣天下服矣太祖將從之荀彧曰若是則冀州當得河東馮翊扶風西河幽并之地所奪者衆今分冀州將皆動心一旦生變天下未易圖也公從之

趙州

元和郡縣圖曰趙州趙郡禹貢冀州之域春秋時屬晉戰國時屬趙秦爲邯鄲郡平棘縣地又趙國兩漢及魏以封建子弟

趙記云女子盛飾治容習絲竹長袖傾絕諸侯

左傳曰師及齊師衛孔圉及鮮虞伐晉取棘蒲

即今平棘縣也

史記蘇秦說趙曰當今之時山東之建國莫強於趙趙地方二千里西有常山南有漳河東有清河北有燕國漢志曰元氏屬常山縣王莽曰井闢亭趙公子元之封邑故曰元氏

後漢書曰光武北征彭寵陰后從行生明帝於元氏傳舍章帝幸元氏祠光武顯宗於縣舍又祠顯宗於始生堂皆奏樂用新詩復元氏祖

十道志曰高邑縣趙房子之邑竹書紀年作魴子漢以

爲鄣縣

鄣音大各反

後漢復改爲高邑

後漢書曰光武至鄣羣臣請即帝位於是設壇場於鄣

南千秋亭五成陌

今趙州柏鄉縣

鎮州

十道志曰鎮州常山郡

元和郡縣圖曰禹貢冀州之域周爲并州地春秋時爲

鮮虞國戰國時屬趙秦兼天下爲鉅鹿郡

十三州志曰真定本名東垣以河東有垣故此加東耳
漢書曰高祖時代相陳豨反使趙利守東垣上自攻之
不下卒罵帝帝怒增兵急攻城斬罵者改曰真定

漢志曰井陘屬常山郡

穆天子傳曰天子獵于鉶山注曰燕趙謂山脊爲鉶即
今井陘是

史記曰秦始皇十八年攻趙王翦下井陘

元和郡縣圖曰靈壽縣本中山國都也

十三州志曰中山武公本周之同姓其後桓公不恤國政晉太史餘見周王王問之諸侯孰先亡對曰中山之俗以晝爲夜以臣觀之中山其先亡乎其後魏樂羊爲文侯將拔中山封之靈壽

戰國策曰九門縣本爲九室而名趙武靈王改爲九門縣

史記曰趙惠王三十八年藺相如城九門大城

定州

十道志曰定州博陵郡禹貢冀州之域虞舜十二州蓋并州之域春秋時鮮虞白狄之國後改爲中山國

張曜中山記曰郡理中山以其城中有山故謂之中山又云郡治中人城

漢志曰盧奴縣屬中山以其城中有山故謂之中山又云郡治中人城

漢志曰盧奴縣屬中山國盧水出焉

圖經曰安喜縣即古盧奴縣也有黑水故池深而不流

俗謂黑水爲盧不流爲奴

漢書外戚傳曰宣帝母王夫人微時與父泣別於柳宿

城

在豐義縣

十道志曰唐縣本春秋時鮮虞邑也漢爲唐縣地

地理志曰唐縣屬中山國王莽曰和親故堯國也堯爲唐侯邑於此堯山在唐東北望都界孟康曰晉荀吳伐鮮虞人中人今中人亭是

應劭風俗通曰中人城北四十里有左人亭鮮虞故邑

左人亭即

唐縣也

漢書曰望都屬中山國莽曰順調堯山在此堯母慶都山在南登堯山見都山

圖經曰陘邑縣本七國時中山之苦陘縣也

史記曰李克爲中山相苦陘之吏上計入多於前克曰苦陘山無山林之饒無藪澤牛馬之息而入多於前是擾亂吾民也於是免之

十道志曰鼓城縣春秋鼓子之邑漢下曲陽之地

春秋左氏傳曰晉荀吳圍鼓以鼓子爲鞮歸

十三州志曰中山有上曲陽故加下耳

圖經曰北平縣本秦曲逆縣之地屬中山國

漢書曰高祖北征還過曲逆上其城望室甚大曰壯哉
縣吾行天下獨見雒陽與是耳於是封陳平爲曲逆侯
後漢書曰章帝北巡北兵以曲逆名不善改爲蒲陰

瀛州

十道志曰瀛州河間郡禹貢冀州之域舜十二州并爲

之境春秋時屬燕國秦併天下爲河間郡漢爲河間國
郡國志曰瀛州以地帶滄海物產滋羸故以名之又云
以瀛海爲名

漢志曰河間國領縣四樂成侯井武隧弓高王莽曰朔
定

應劭曰在兩河之間

漢書曰武帝時望氣者云西北有女極貴遂訪之於河
間得釣弋夫人

十道志曰博野縣本漢蠡吾縣地

十三州志曰太初元年蠡吾侯志入繼孝質是爲孝桓
帝追尊其父蠡吾侯翼爲孝宗皇帝陵曰博陵因改爲
博野縣

漢志曰高陽縣屬涿郡王莽曰高亭以其在高河之陽
故曰高陽

漢志曰東平舒屬渤海郡以代郡有舒故此加東也

即平

舒縣

太平御覽卷一百六十一

欽定四庫全書

太平御覽卷一百六十二

宋 李昉等 撰

州郡部八

河北道中

魏州

博州

莫州

深州

易州

幽州

順州

涿州

薊州

燕州

檀州

媯州

平州

營州

德州

棣州

滄州

貝州

魏州

元和郡縣志曰魏州魏郡禹貢兗冀二州域在夏即有

扈之國春秋時為晉地戰國時為衛魏二國地秦滅魏置東郡滅趙置邯鄲郡漢置魏郡後漢封曹操為魏王史記曰邯鄲亦漳河之間一都會也北通燕涿南有鄭衛俗與趙相類然近梁魯重義而矜節

漢書曰邯鄲土廣俗雜大率精急高氣勢輕為姦漢志曰魏郡王莽曰魏成領鄴館陶等十八縣

後漢書曰曹操為魏公操分魏郡為東西部置都尉

元和郡縣志曰元城縣有沙麓山即春秋經所書沙麓

崩後為漢元后興之象也

博州

元和郡縣志曰博平郡禹貢兗州之域春秋時齊之西界聊攝地也戰國時為齊地秦漢為東郡也

史記曰齊田單以聊城歲餘士卒多死而聊城不下魯仲連為書約之矢以射城中燕將見書猶豫不決乃自殺史記曰齊威王伐晉至北陵徐廣注曰東郡之博平

莫州

十道志曰莫州文安郡其地歷代所屬與瀛州同唐景雲二年分瀛州置

漢志曰鄭縣屬涿郡王莽曰言符

郡國志曰鄭縣有易京城漢末公孫瓚築京以自固圍塹十重以鐵為門諸將家作樓以千計並高五六丈為素紹所攻城樓皆陷沒

圖經曰清苑縣本漢樂鄉縣也

漢志曰樂鄉屬信都王莽曰樂丘

史記曰漢高祖過趙問樂毅有後世乎對曰有樂叔高
帝封之樂鄉

後漢書曰獻帝初公孫瓚據幽州先是有童謠曰燕南
垂趙北際中間不合大如礪惟有此中可避世瓚以易
地當之乃築京以自固也

深州

元和郡縣圖曰深州饒陽郡禹貢冀州之域七國時為
趙地秦為鉅鹿郡地漢為饒陽縣隋置深州以州西故

深城為名也

漢志曰饒陽屬涿郡在饒河之陽故名之

又曰安平屬涿郡王莽曰廣望亭

漢書高帝六年封鄂千秋為安平侯

後漢書曰王郎起光武自薊東南馳晨夜草舍舍止息也至

饒陽之無蒹亭時天寒烈衆皆飢疲馮異上豆粥明

旦光武謂諸將曰昨得公孫豆粥飢寒俱解公孫異字

易州

十道志曰易州上谷郡禹貢冀州之域有虞分冀州為
并州之地春秋時燕趙之分秦併天下為上谷郡地漢
置涿郡今州即涿郡之故安地也

又曰易縣本漢故安縣也

漢志曰故安屬涿郡

漢書曰文帝封申屠嘉為故安侯

九州記曰易縣西南三十里有送荆陘即荆軻入秦路
河北記曰易縣前五公城王潭不從王莽其後潭生五

子避隱於此世祖並封為侯

十道志曰涑水縣本漢迺縣也

又曰容城屬涑郡莽曰深澤

漢志曰迺屬涑郡莽曰迺屏

漢書年表曰景帝封匈奴降王隱強為迺侯

十道志曰遂城戰國時遂縣漢之北新城

史記曰趙悼襄王二年李牧攻燕拔武遂

漢志曰北新城屬中山國莽曰朔平土地十三州志曰

河南有新城故此如北

幽州

十道志曰幽州范陽郡禹貢冀州之域虞舜十二州為幽州夏殷省併冀州復置幽州秦為漁陽上谷等五郡漢高祖分上谷置涿郡武帝十三州為幽州

釋名曰幽州北幽昧之地故曰幽州

晉地道記曰幽州因幽都以為名

山海經曰北海有幽都之山

爾雅曰北方之美者幽都之筋角

晉地道記曰舜以冀州南北廣大分燕地北地為幽州
漢志曰漁陽郡屬幽州莽曰通路亭

史記曰顓頊都於帝丘其地北至幽陵

又曰周文王之滅紂封召公於北燕

世本曰居北燕宋忠曰有南燕故曰

北燕

郡國志曰箕星散為幽州分為燕國其氣躁急通濟趙
渤海之間一都會也

史記曰燕秦千樹栗與封侯等士馬所生有魚鹽桑棗之利

後漢書曰公孫瓚破劉虞盡有幽州之地

三國典略曰東魏薛琚嘗夢山上掛絲以告所善張亮曰山上絲幽字也君必為幽州後果如之

禮記曰武王克商封黃帝之後於蓟

史記曰鄒子之燕昭王擁篲前驅請為弟子受業築碣石宮以處鄒子親往師之

又曰昭王謂郭隗曰願得賢士以身事之隗曰王必欲致士先從隗始況賢於隗者豈遠千里哉於是昭王為隗改築宮而師事之樂毅自魏往鄒衍自齊往劇辛自趙往士爭歸燕

漢志曰安次縣屬渤海郡又續漢志曰安次縣屬漁陽郡

圖經曰武清縣本漢之雍奴縣也

酈道元注水經曰雍奴藪澤之名四面有水壅不流曰奴

魏志張郃傳曰從擊袁譚於渤海別將軍圍雍奴大破之

順州

方輿志曰歸順州其地乃燕之北境燕太子丹使荆軻獻地圖即謂此也燕太子初以置歸化順義二郡同領懷柔二縣復又立歸順州以理焉

涿州

圖經曰涿州涿郡古涿鹿之地舜十二州為幽州地禹

貢為冀州之域春秋戰國為燕國之涿邑漢高帝置涿郡

史記曰黃帝與蚩尤戰於涿鹿之野

漢志曰涿郡高帝置莽曰垣翰屬幽州領縣二十九

薊州

圖經曰薊州漁陽郡禹貢冀州之域春秋及戰國時屬燕秦時於此置漁陽郡二漢因之

又曰漁陽縣本北無終子國也有無終山城

春秋左氏傳曰莊三十年齊人伐戎杜預注曰山戎北狄無終三名其實一也

漢志曰無終屬右北平故無終子國也

燕州

釋名曰燕苑也在涿鹿山南宛宛然以名之

春秋說題辭曰箕尾為燕陰氣浸生故習俗貪利地宜栗

史記蘇秦說燕文侯曰燕東有朝鮮遼東北有林胡樓

煩西有雲中九原南有呼沱易水地方二千里帶甲數十萬南有碣石鴈門之饒北有棗栗之利民不佃作而足於棗栗矣此所謂天府也

又貨殖傳曰燕秦千樹栗以比封侯

檀州

十道志曰檀州密雲郡禹貢冀州之域春秋戰國時並為燕地秦為漁陽郡在漢領白檀等十二縣

又曰本漢庠奚縣屬漁陽郡

漢志曰犀奚屬漁陽莽曰敦德

犀音題

又曰燕東有漁陽郡

漢書曰漢李廣弭節白檀

魏書曰曹公越北塞歷白檀破烏丸於柳城

續漢書曰白檀縣即右北平

媯州

十道志曰媯州媯川郡禹貢冀州之域舜暨周為幽州之域春秋戰國並屬燕國秦併天下為上谷郡為潘縣

也

漢志曰燕西有上谷郡

又曰上谷郡秦置莽曰朔調屬幽州領縣十五

又曰潘縣屬上谷郡莽曰樹武

潘音普
半反

晉太康地理志曰潘縣更屬廣寧郡

史記曰軒轅黃帝戰於阪泉之野

十道志曰阪泉在懷戎縣

周書曰黃帝殺蚩尤於中冀名曰絕轡之野亦其地

史記蘇秦往說燕文侯曰燕東有朝鮮遼東北有林胡樓煩西有雲中九原南有呼沱易水地方二千里帶甲數十萬

史記曰燕築長城自造陽至襄平

造陽即媯州之地名也

平州

十道志曰平州北平郡禹貢冀州之域舜十二州為營州之境周為幽州之地春秋時為山戎孤竹白狄肥子二國地秦兼天下為遼西郡肥如縣地

漢志曰肥如屬遼西郡肥子奔燕燕封於此

史記曰齊桓公北征山戎至孤竹界耳之溪見一人長八尺具衣冠右祛衣走馬前桓公問於管仲對曰山之神有俞兒霸王之君興則前導祛衣示前有水祛衣右右可涉至卑耳之溪從左方涉其深至膝自右以涉桓公拜曰仲父聖至於此

魏志曰曹公北征烏丸田疇自盧龍道引軍出盧龍塞塹山堙谷五百餘里經白檀厯平剛登白狼望柳城道

今在盧龍縣

營州

十道志曰營州柳城郡禹貢冀州之域其在十二州為營州地周為幽州春秋為山戎之地戰國時屬燕秦漢為遼西郡

郡國志曰北當營室故曰營州

漢志曰遼西郡秦置屬幽州領縣十四

後漢書曰遼西郡即烏丸鮮卑蹋頓所居

十六國春秋慕容皝傳曰柳城之北龍山之南所謂福德之地也可營制規模築龍城構宮室改柳城為龍城縣遂都之改曰和龍宮

後漢輿地記曰齊舜時營州之域燕西置營丘郡於其城內今柳城縣有營丘城

德州

元和郡縣志曰德州平原郡禹貢兗州之域春秋戰國時齊地秦兼天下為齊郡地漢分齊郡置平原郡

漢志曰平原郡高帝置王莽曰河平領縣十九

十道志曰脩縣本漢條縣也景帝封周亞夫為條侯後改為脩

漢志曰脩縣屬信都莽曰脩治

元和郡縣志曰安德縣有鬲津枯河禹貢九河之一

棣州

元和郡縣志曰棣州樂安郡禹貢置青州之域又曰兗州之域春秋時為齊地秦併天下為齊郡漢為平原渤海

海千乘三郡地

左氏傳曰賜我先君履東至於海西至於河南至於穆陵北至於無棣

十道志曰厭次本漢富平縣

漢志曰富平侯國屬平原郡王莽曰樂安亭後漢明帝改為厭次

漢書東方朔傳曰朔平原厭次人也

十道志曰滴河縣本漢枋

勅音力

漢志曰勃屬平原郡莽曰張鄉

十道志曰蒲臺本漢濕沃縣也

漢志曰濕沃屬千乘郡莽曰延亭

三齊記曰蒲臺高八十尺始皇所頓處在臺下縈蒲縈
馬今蒲猶縈也

滄州

十道志曰滄州景城郡禹貢兗州之域虞舜及周為幽
州之域春秋時屬齊魯七國時屬齊趙秦併天下以齊

地置齊郡以趙地置鉅鹿郡漢高帝分鉅鹿置渤海郡
分齊郡置平原郡

漢志曰渤海郡高帝置莽曰迎河在渤海之濱因以為
名

圖經曰渤海濱滄州之地屬趙分居多

漢志曰趙中山地薄人衆丈夫相聚遊戲悲歌忼慨起則
椎剽掘冢作姦巧多弄物為倡優

十三州志曰渤海風俗鷙戾多氣力輕姦宄

十道志曰清池縣漢之浮陽縣也

漢志曰浮陽屬渤海郡莽曰浮城

十州志曰浮陽水所出東入海

漢書曰宣帝時渤海飢盜賊起龔遂單車入境平之後
勸叛者賣劍買牛民皆知勸

漢志曰千童縣靈帝改曰饒安屬渤海郡

又曰樂陵縣屬平原郡莽曰美陽

貝州

元和郡縣志曰貝州清河郡禹貢兗州之域春秋時屬魯七國時屬趙秦兼天下以為鉅鹿郡漢又分置清河郡

十道志曰後周武帝建德六年既平齊後於齊地置貝州

左氏傳曰齊襄公田於貝丘

漢志曰清河郡高帝置王莽曰平河屬冀州領縣十四

圖經曰清河縣秦為厓縣

厓音趨亦反

漢為信城縣

漢志曰厝屬清河郡王莽曰厝治安帝以孝德皇帝塋於厝改曰甘陵

十道志曰武城趙邑東武城也

史記曰趙平原君勝封東武城

元和郡縣志曰夏津縣本漢鄒

音縣也

漢志曰鄒屬清河郡王莽曰善陸

漢書曰高后封呂他為鄒侯

太平御覽卷一百六十二

欽定四庫全書

子部

太平御覽卷一百六十八

三至

詳校官中書_臣金應珩

員外郎_臣牛勣文覆勘

總校官降調編修_臣倉聖脈

校對官學正_臣翁樹棠

謄錄監生_臣施華

欽定四庫全書

太平御覽卷一百六十三

宋 李昉等 撰

州郡部九

河北道下

蒲州

晉州

潞州

絳州

澤州

遼州

沁州

隰州

慈州

汾州

并州

石州

嵐州

代州

忻州

蔚州

朔州

雲州

蒲州

十道志曰蒲州河東郡置在河東縣本漢蒲坂地

左傳曰晉獻公滅魏以賜畢萬服虔注曰在晉蒲坂

史記曰季布為河東太守文帝謂布曰河東吾股肱郡
博物志曰河東有山澤近鹽沃土之人不才少有名入

魏志杜畿傳曰畿為河東太守開學宮後河東多儒者

春秋左氏傳曰晉人謀去故絳諸大夫皆曰必居郇瑕

氏之地

郇瑕古國名河東
解縣西北郇城

沃饒而近鹽國利君樂不可

失也韓獻子曰不可郇瑕氏土薄水淺其惡易覲易覲

則民愁民愁墊隘於是乎有沈溺重脰之疾不如新田

土厚水深居之不疾有汾澮以流其惡夫山澤林鹽國之寶也國饒則民驕佚近寶則公室乃貧不可謂樂公說從之郡國志曰猗氏縣猗頓所居之地猗頓魯窮士也問術於陶朱公公教之蓄五牸遂富漢因之名縣

史記曰魏都安邑惠王三十一年秦用商君東侵地至河而齊趙數破敗我安邑近秦於是徙居大梁

漢志曰河東郡秦置莽曰北陽領縣二十四

又曰蒲反故曰蒲秦更名莽曰蒲城應劭曰秦始皇東巡

見長坂故因加反孟康云晉文公以賂秦人還蒲魏人喜曰蒲反矣遂名之師古曰應說是

絳州

元和郡縣志曰絳州絳郡禹貢冀州之域春秋時屬晉戰國時為魏地秦三十六郡為河東郡

後漢書曰章帝元和三年行幸安邑觀鹽池

晉太康地志曰安邑有司鹽都尉別領兵五千

圖經曰晉穆侯遷都於絳其曾孫孝侯改絳為翼翼為

晉之舊都後獻公復為絳絳在今曲沃故城二里有絳邑故城是故絳在翼城東南有故翼城是也

十道志曰正平縣有九原一名九原即趙簡子觀處

禮記曰趙文子與叔譽觀於九原文子曰死者如可作也吾誰與歸叔譽曰其陽處父乎文子曰行并植於晉國不殺其身其智不足稱也其舅犯乎文子曰見利不顧其君其仁不足稱也我則隨武子乎利其君不忘其身謀其身不遺其友漢書曰元鼎六年幸緄氏至此聞南越破遂立為聞喜

縣

圖經曰聞喜縣有董澤左傳曰董澤之蒲可勝既
乎

晉州

元和郡縣志曰晉州平陽郡禹貢冀州之域堯舜所都
周為冀州地春秋時屬晉戰國時屬韓秦為河東郡地
十道志曰本漢平陽縣地

漢志曰平陽縣屬河東郡以其在平水之陽故名之

前趙錄曰太史令言於元海曰蒲子崎嶇非可久安平陽唐堯所都於是徙居平陽也

兩河記曰洪洞縣以地山嶺重複控據要險故曰洪洞焉

漢志曰襄陵屬河東郡王莽曰幹昌有晉襄公之陵因以名

十道志曰霍邑漢疵縣也

漢志曰疵屬河東郡周厲王所奔也莽曰黃城

澤州

元和郡縣志曰澤州高平郡禹貢冀州之城春秋時屬晉戰國時屬韓後魏屬韓秦蕪天下置并州今州即上黨郡高都縣地

史記曰秦使武安君白起攻趙趙發兵拒秦秦大破趙於

長平

長平在高平縣西北有長平故城

十道志曰澤州以獲澤為名

漢志曰獲澤屬河東郡禹貢析城山在其西南

獲音胡郭反

墨子曰舜漁於濩澤

十道志曰晉城縣本漢高都縣也

漢志曰高都屬上黨郡有天井關

元和郡縣志曰高平縣本漢洙氏縣也

洙音胡
玄反

漢志曰洙氏屬上黨洙水所出

竹書紀年曰梁惠王九年晉取洙氏

史記曰趙成侯十六年與韓魏分晉封晉君以端氏

潞州

元和郡縣志曰潞州上黨郡禹貢冀州之域殷為黎國
春秋時屬晉又兼有潞子之國秦為上黨郡地

左傳宣十五年曰潞子嬰兒之夫人晉景公之姊也鄆舒
舒為政而殺之又傷潞子之目鄆舒相晉侯伐之滅潞鄆

舒奔衛衛人歸晉晉人殺之

戰國策曰秦有安邑則韓必無上黨以遠韓近趙故秦
歸趙

隋圖經曰上黨南陽古以為縣實都也

漢志曰上黨郡秦置屬并州有上黨關

又曰壺關屬上黨郡黎侯國今有黎亭

釋名曰上黨黨所也在山上其所最高故曰上黨

上黨記曰高下赤壤其地山阻百姓不居即此郡也

圖經曰後周建德七年于襄垣縣立潞州以其侵汾潞

為名

漢志曰長子縣屬上黨郡周史辛甲所封師古曰長讀

長短之長

竹書紀年曰梁惠王十二年鄭取屯留尚子即長子之地也

左傳襄公十八年晉人執衛行人石買於長子執孫蒯

於屯留

長子屬上黨

又曰鄭伯如晉晉人執諸銅鞮

晉太康地記曰銅鞮故晉大夫羊舌赤邑世號赤為銅鞮伯華漢以為縣

遼州

圖經曰遼州樂平郡禹貢冀州之域春秋時其地屬晉
戰國屬韓後屬趙秦漢為上黨郡貞觀中避諱改為儀
州後又為箕州復為遼州

十道志曰和順縣本漢沾縣地即趙閼與邑

史記曰秦昭襄三十八年攻趙閼與趙奢曰其道遠險
阨譬如兩鼠鬪於穴中將勇者勝乃使趙奢將大破秦
軍乃解閼與之圍

漢書高帝紀曰韓信破代相夏說於閼與

漢志曰沾縣屬上黨郡有沾水出壺關

沾音他
燕反

沁州

十道志曰沁

七浸切

州陽城郡本漢穀遠縣地

元和郡縣志曰禹貢冀州之域春秋時其地屬晉戰國時屬韓在秦為上黨郡地今州即漢上黨之穀遠

漢志曰穀遠屬上黨郡王莽曰穀近

晉地記穀遠今名孤遠後代語訛耳

十道志曰綿上縣亦穀遠縣之地以縣西有綿上焉蓋

晉介之推地

隰州

圖經曰隰州大寧郡夏殷已前其地與箕沁同在周為晉之北鄙

元和郡縣志曰禹貢冀州之域春秋時為晉地七國時屬魏秦為河東郡地漢為蒲子縣屬河東郡

國語曰驪姬謂晉獻公曰蒲與二屈君之疆也不可以無主若太子主曲沃二公子主蒲與屈乃可以威民而

懼戎

蒲即蒲子縣

郡國志曰隰州前二里有泉下隰故取下隰之義為名

十道志曰永和縣本漢狐讞縣也

讞音之涉反

漢志曰隰州屬河東郡

慈州

元和郡縣志曰慈州文成郡禹貢冀州之域春秋時晉之屈邑獻公子夷吾所居也秦併天下屬河東郡

漢地理志曰北屈王莽曰朕北應劭曰有南屈故稱北

璣曰汲郡古文翟章救鄭次于南屈

左傳僖公二年晉荀息請以屈產之乘與垂棘之璧假

道於虞以伐虢

屈地生良馬

元和郡縣圖曰吉昌縣有姚襄城西臨黃河控帶龍門
孟門之險周齊交爭之地齊後主武平二年遣斛律明
月破周兵於此城下

郡國縣道記曰吕香本漢之北屈

漢志曰騏屬河東郡侯國

汾州

十道志曰汾州西河郡禹貢冀州之域其在虞夏及周屬并州春秋時晉地六國時屬趙秦併天下地屬太原郡

左傳昭元年曰昔金天氏有裔子曰昧為玄冥師生允格臺駘臺駘能業其官宣汾洮障大澤以處太原

太原晉陽

也帝用嘉之封諸汾川又昔高辛氏有二子伯曰閼伯季曰實沈居於曠林不相能也后帝不臧遷閼伯於商

丘主辰商人是因遷實沈於大夏主參唐人是因

大夏今晉陽縣

其季世曰唐叔虞及成王滅唐而封太叔焉故參為晉

星

叔虞封唐是為晉侯

又昭二年曰齊陳無宇送女晉侯謂之少齊謂陳無宇

非卿執諸中都

中都晉地在河西介休縣

又僖二十四年曰晉侯賞從亡者介之推不言祿祿亦弗及遂隱而死晉侯求之不獲以縣上為之田曰以志吾過且旌善人

元和郡縣志曰子夏居西河吳起守西河皆謂此也

禮記檀弓曰子夏喪其子而喪其明魯子弔之子夏哭曰天乎予之無罪也魯子怒曰商汝何無罪也吾與汝事夫子於洙泗之間退而老於西河之上使西河之民疑汝於夫子爾罪一也

唐書曰高祖初起兵帥次霍邑隋將宋金剛拒不得進屯軍賈胡堡會霖神語曰若向霍邑當東南傍山取路

八日雨止我當助破之

賈胡堡在靈石縣也

并州

元和郡縣志曰并州太原府禹貢冀州之域春秋時為晉戰國時為趙地秦併天下置太原郡

尚書禹貢曰既脩太原至於岳陽

春秋元命苞曰并之為言轉合交并

釋名曰并者兼并也言或并或設

元和郡縣志曰中國曰太原夷狄曰大鹵按晉大鹵太原大夏夏墟晉陽六名其實一也

左傳曰晉荀吳敗狄於大鹵

釋名曰地不
生物曰鹵

太康地記曰并州不以衡水為號不以恒山為稱而云
并者蓋以兩國之間乎

帝王世紀曰帝堯始封於唐又徙晉陽及即帝位都平
陽平陽乃今晉陽即太原也

又曰禹自安邑都晉陽至桀徙都安邑後至周成王以
封弟叔虞是為晉侯

史記曰成王與叔虞戲削桐葉為珪曰以是封汝周公

請封於唐王曰吾戲耳周公曰天子無戲言遂以封之
魏志曰魏太祖圍袁尚於鄴時袁紹外甥高幹為并州
刺史牽招說幹曰并州左有恒山之險右有大河之固
北有強胡宜速迎尚來州與之併力觀變幹不從故
敗

史記曰智伯率魏攻趙襄子於晉陽引汾水灌其城不
沒者三版

春秋後語曰張孟談謂趙襄子曰董安于之在晉陽公

宮之垣皆荻蒿

隋圖經曰并州其氣勇抗誠信韓趙魏時為三晉剽

足妙

反悍盜賊常為他郡劇

漢志曰太原郡秦置有鹽官在晉陽屬并州領縣二十

一又曰榆次屬太原郡王莽曰太原亭

史記秦本紀曰莊襄王使蒙驁攻趙榆次

漢志曰陽曲屬太原應劭曰黃河千里一曲當其陽故

曰陽曲

石州

元和郡縣志曰石州昌化郡禹貢冀州之域虞及周屬并州春秋時屬趙亦為白狄之地秦為西河郡離石地史記曰秦伐趙取離石

前趙錄曰今離石左國單于所徙庭是

十六國春秋曰晉惠帝以劉元海為離石將兵都尉

嵐州

元和郡縣志曰嵐州樓煩郡禹貢冀州之域春秋時為

晉國後屬趙本樓煩故地秦為太原郡漢為太原郡之汾陽地

史記曰趙惠文王主父行地遂出代西遇樓煩王於西河而破其兵取其地為縣

漢志曰汾陽屬太原郡汾水所出

漢書項羽傳曰漢有善射者曰樓煩楚挑戰樓煩輒射殺之使射羽羽大怒瞋目叱之樓煩目不能視手不能

發

樓煩縣屬鴈門此縣人善騎射

莊子曰堯治天下之名平海內之政往見四子藐姑射之山汾水之陽窅然喪其天下

代州

元和郡縣志曰代州鴈門郡古并州之域春秋時晉地戰國時屬趙秦置三十六郡鴈門是其一焉漢因之河東記曰代句注在州西北鴈門界西陁山是也

史記曰趙襄子與韓魏共滅智伯分晉地則趙有句注之北

爾雅曰比陵西踰鴈門是也

郭璞注曰西踰鴈門山也

地理志曰自傍陰山至高闕代王以為塞

漢地理志曰鴈門郡秦置句注山在陰館王莽曰填狄屬并州領縣十四

山海經曰鴈門出其間在高柳代中

史記曰趙襄子與代王會於夏屋以銅斗擊殺代王而取其地

十道志曰五臺縣本漢慮虎縣

漢志曰慮虎屬太原郡

師古曰慮虎音盧夷

又曰崞縣屬鴈門王莽曰崞張

又曰繁峙屬鴈門王莽曰當要

忻州

元和郡縣志曰忻州定襄郡古并州之域春秋時為晉國戰國時為趙地秦漢為太原郡地今州即漢太原郡之陽曲縣也

十道志曰忻州置在秀容縣本漢曲陽縣後漢末於此

置九原縣

十三州志曰漢末大亂匈奴侵邊自定襄已西盡雲中鴈門之間迨至建安中丞相曹公集荒郡之戶以為縣聚之九原界以立新興郡領九原等縣屬并州

元和郡縣志曰秀容城劉元海新築元海感神而生姿容秀美因以為名

蔚州

元和郡縣志曰蔚州安邊郡禹貢冀州之域虞及周屬

并州春秋時地屬晉戰國時屬趙秦漢為代州

漢志曰靈丘屬代郡瓚曰靈丘之號在趙武靈王之前
又漢書曰酈食其說漢王曰杜白馬之津距飛狐之口
晉書曰建興中劉琨自代出飛狐口奔於安次

朔州

元和郡縣志曰朔州馬邑郡屬禹貢冀州之域虞及周
為并地春秋時為北狄戰國時屬趙秦為鴈門郡之馬
邑也

漢志曰馬邑屬鴈門郡王莽曰章昭

晉太康地記曰秦時建此城輒崩不成有馬周旋馳走
反覆父老異之因依以築城遂為馬邑

後魏書曰道武天興元年遷都平城孝文遷都之後於
此置朔州

冀州圖經曰趙武靈王胡服而征遂有獫狁之地漢高帝
以韓王信壯武乃以太原郡為韓國徙信以備胡信以
晉陽去塞遠請理馬邑上乃許之後匈奴圍信信數求

敕上賜書責信信懼以馬邑降胡

雲州

元和郡縣圖曰雲州雲中郡禹貢冀州之域虞及周為并州之域春秋時為北狄地戰國時其地屬燕其後屬趙秦鴈門郡地漢鴈門郡之平城縣也

漢志曰平城東郡都尉治王莽曰平順

郡國志曰雲中五原唾出口成冰言苦寒也

漢書曰七 years 上自將擊韓王信于銅鞮

縣名

信亡走匈奴

與匈奴共距漢上從連戰乘勝逐北遂至平城為匈奴所圍七日用陳平秘計得出

元和郡縣圖曰後魏道武於此建都東至上谷西至河南南至中山北至五原地方五千里以為匈奴服孝文改為司州牧置代尹

太平御覽卷一百六十三